

八旗通志卷之一百四十六



名臣列傳

卷六

正黃旗滿世職大臣

八旗通志初集卷之一百四十六  
名臣列傳六

正黃旗滿洲世職大臣一

楊古利額駙子塔阿哈旦

楞額禮

那木泰子阿哈連

譚泰子唐古哈孫俄福和

譚布

宜爾德

舒楞額



楊古利額駙滿洲正黃旗人。姓舒穆祿氏。世居  
渾春地方。其父郎柱為庫爾喀部長。初翊戴

太祖高皇帝時。通往來。

太祖厚遇之。命其子楊古利入侍。以女妻焉。賜為額駙。

郎柱為部人所害。圍其家。楊古利之母繫幼子  
那木泰於背。屬鞬佩刀。射衆突出。偕其族來歸。  
庫爾喀部人尋亦內附。楊古利聞而逆之。手刃  
殺父者。割耳鼻啖之。以復父讐。時年甫十四。

太祖深異焉。日見信任。始令守汛江上。警備嚴密。無敢

犯者。征輝發多壁城。阻於水。衆難之。楊古利率先逕渡。大獲而還。取納殷部。及朱舍里路。安褚拉庫路。皆著功績。哈達孟格布祿貝勒恃其勇。常懷反側。

太祖往討之。拔其城。楊古利奮勇先登。生擒孟格布祿。丁未年。遷蜚悠城。戶口。楊古利與達爾漢轄。率兵三百人。護之前行。烏喇遣兵萬人。邀諸路。楊古利勵衆曰。吾儕平居相謂。與其死於疾。無寧死於敵。此非臨敵時乎。遂持矛突入。鏖戰。連殺

七人。敵稍却。與之隔河相拒。及諸貝勒兵至。復併力大破之。征輝發越寨柵二重。先入奪其城。取赫席黑路。為軍前鋒。馬兒古里村人覺之。走負山險。因攻據其巔。馳下擊之。盡殲。丁壯俘子女以歸。進征木倫路。克吳兒瑚麻村。復視林中烟跡。三往略之。俘獲甚衆。戊申年。從大兵取烏喇。金州城。城中迎射拒命。楊古利冒矢攻克之。癸丑。大兵復征烏喇。楊古利先衆進戰。攻青河。敵勢甚銳。

太祖遣使持矢。召諸將退。楊古利不退。麾衆薄城。由一隅疾攻拔之。大兵擊明兵於界凡。楊古利與阿巴泰貝勒等。爭先馳敵。破其軍。是夕。進擊商顏崖之兵。有

旨令被傷者勿往。楊古利獨不肯留。累創繫腕。率十牛。衆兵。憑高馳擊明大營兵。破之。取鐵嶺。遇蒙古介賽貝勒兵四百人。敗之。天命六年。大兵取瀋陽。衆頗瞻顧。楊古利拔刀揮本旗兵入。敗之。既克瀋陽。大兵乘勝進取遼陽。仍先登陷陣。摧其步卒。遂奪河橋。與明兵戰於沙嶺。大敗其衆。遼陽既拔。

太祖嘉其勞績。憫其傷痍。命位次貝勒八人下。統左翼兵。授一等總兵官。世職。令勿更臨戰陣。十年。明毛文龍兵三百人。夜入耀州。楊古利復率兵擊敗之。盡殲其衆。天聰三年九月。同阿山等緝逃人。至雅爾古地方。遇毛文龍採參者。殺九十六人。擒千總三員。及其從者十六人。以歸。是月。太宗文皇帝統大兵征明。楊古利率擺牙喇兵。敗總兵

滿桂兵於明都城之北。我礮手陷敵伏中。復率親軍十餘人潰其圍。悉出之。及大軍還。同阿巴泰貝勒等略通州。火其船。遂取張家灣。明兵來援薊州。我兩紅旗擺牙喇兵少却。楊古利率內大臣轄等及正黃旗擺牙喇兵直前敗之。師旋。命以兩紅旗規避各官贖罪物盡給之。楊古利率悉以分賞諸將士。六年。

太宗親征察哈爾。

命同阿巴泰貝勒等留守。與明兵戰於錦州。明兵銳甚。

我六旗擺牙喇兵俱却。楊古利大怒。獨率本旗擺牙喇兵直前敗之。

太宗嘉焉。特授三等公。尋錄從前軍功。進超品公。復從太宗由口外入明邊。攻大同宣府。與阿巴泰貝勒等拔靈邱縣。殺知縣。守備各一人。復攻墮王家莊。取之。七年六月。應

詔條陳。言征伐之事不可間隔一年。若踰年不往。則敵人心寬。乘機修備。欲圖再舉。恐誤大事。我國暇則一年兩征。不暇亦一年一往。乃為善策。若再

緩則不可矣。我今當深入其境。遇城必克。所克之城。即令已出痘。貝勒將帥率兵長駐。

聖主與未出痘。貝勒還都。倘不得城堡。則令兵縱略。焚其房屋。遇敵則擊。拒者俘之。降者編為戶口。所俘各照牛录。派數上獻。至於兵士所獲。不計多寡。聽其自取。若此。則人人貪得。不待驅逼。其男婦皆自鬻衣服。以供買馬之需。而兵勢大振矣。所得城堡。惟許貝勒更番駐劄。以下兵將不得更換。若不勞苦。豈有能成事拓地者乎。如謂有

妨農事。則待農事竣。興師令婦子隨後收獲。則農事亦無妨也。今朝鮮。察哈爾。且置度外。山海關外。寧遠。錦州。亦且緩圖。但宜深入腹裡。腹裡既得。朝鮮皆吾手足。察哈爾自爾歸順。不則遠遁矣。時諸大臣所

奏亦多相合。

太宗乃決意證明。崇德元年。與多羅英郡王阿濟格等。證明直入長城。過保定府。至安州。克昌平等十。二城。敗敵五十八陣。生擒巢丕昌等。俘獲十餘。

萬二年正月。

太宗親征朝鮮。朝鮮全羅忠清兩道巡撫總兵來援。營於南漢城。楊古利奉

命同和碩豫親王多鐸擊之。值天雪陰晦。不見敵營。遂縱兵進擊。敗山下兵。追至山嶺大營。朝鮮有敗卒竄伏崖側。竊發鳥鎗。傷中楊古利。創重而卒。時年六十有六。楊古利凡在行間。率先破敵。克建奇勲。於國家大有裨益。自早歲從戎。衝鋒挫銳。所向披靡。

攻城輒克。其後

太祖惜之。不令身臨戰陣。而壯心未已。遇敵忘軀。行軍四十餘年。大小百餘戰。被創最多。功業特偉。而持身敬慎。累事

兩朝。未嘗獲譴。

太宗寵遇之。禮數殊絕。嘗

命本牛录護軍為之守門。賜豹尾槍二桿。令親軍佩之。甲卒二十人為衛。賞賚戶口。及牲畜金幣無筭。其卒於軍也。



太宗哭之慟。羣臣屢勸不止。親臨其喪。奠酒。賜御服黑貂裘。套帽。鞞。殯之。視含殮畢。始旋。比櫬至。

太宗郊迎之。命諸王百官悉往祭。塋之日。

太宗復親臨奠醊。命本牛录內八戶守其塚。是年十一月。追封武勳王。建碑墓道。其祭文云。

寬溫仁聖皇帝制曰。朕聞有大功之人。必有非常之報。

念爾超品公楊古利。輔理國政。効力宣猷。今又戰歿。爰倣古制。追封爾為武勳王。用彰忠績。萬世無替。尋以子塔瞻襲超品公。

世祖章皇帝追念其勳。命配享

太廟。康熙三十七年。

聖祖仁皇帝謁

陵。至盛京。親奠墓次。三十九年復

御製碑文。勒石紀功焉。子二人。長阿哈旦。自以軍功授

半個前程。次塔瞻。以崇德二年。襲父超品公爵。

擢置內大臣之列。六年。我兵圍錦州。明經略洪

承疇。率兵十三萬來援。

太宗統兵征之。敵遁。

命同內大臣伊爾登等。率八固山擺牙喇甲喇章京各一員。每固山精兵五十名。往伏高橋。將出營。見步兵一千。自杏山潰遁。為我噶布什賢兵所迫。塔瞻等率兵追擊。俱斬之。至高橋設伏。遇明騎兵八十。步兵六百。自杏山逃遁。俱斬之。尋

太宗駐營松山。松山明兵夜遁。衝入

御營。以不能督率眾轄守門罪。降為一等公。順治四年卒。子愛星阿襲爵。見得謚名臣傳。

楞額禮。武勳王楊古利弟也。初任備禦。為右翼

領哨。屢從

太祖高皇帝出征。不違指使。積戰功。授世職。為總兵官。

天命九年。

太祖聞明將毛文龍兵。渡朝鮮義州城西鴨綠江入島中屯田。

命左翼正白旗梅勒額真楞額禮。右翼鑲紅旗梅勒額真吳善引兵一千襲之。途中獲間諜。告以明兵。晝則渡江入島。收獲。夜則收兵渡江。宿義州江岸。楞額禮乘夜進兵。由山僻路潛行伏。平旦度

明兵已渡江。縱兵馳明偵者未及聲。礮舉烽燧。楞額禮已渡鎮江支流。突至其島。明將士大驚。悉棄戈奔潰。楞額禮等於陸地追逐。斬五百餘級。其餘爭入舟。墮水盡溺而死。楞額禮等盡焚島中之糧。而回十一年。統兵征南島。夏五月。奏言。我兩路兵。因朝鮮不與船隻。於二十六日起行而還。擒獲明人。訊之。言黃總兵率兵五千。於五月五日自內地來島中矣。又同超哈爾率兩紅旗兵。監守所得小船。明兵來犯。穆世屯及二卒陣亡。我兵奮勇逆擊。敗之。復沉其小船三隻。岸上明兵不能登舟。溺死者殆半。十月。奉

太宗文皇帝命。同阿山率兵六百入喀爾喀巴林地方。馳逐哨卒。縱火燎原。以張聲勢。大貝勒代善率兵征之。擒其貝勒十四人。俘獲其人民而歸。是月。楞額禮等還。

太宗率諸貝勒大臣。出迎十五里。以楞額禮等勞苦。特許行抱見禮。俘獲人口駝馬。俱分賜貧人。及出征將士。天聰元年。同大貝勒阿敏。出征朝鮮。正

月至明哨地。楞額禮等四將領兵八十。乘夜襲其哨卒。一一就獲。六哨無一脫者。十四日夜。兵臨朝鮮義州。豎梯登城克之。襲城時。艾博巴圖魯先登。楞額禮等次之。諸軍相繼而入。殺府尹李筦等。及城中兵卒。俘其居民。三年。海島漢人來駐朝鮮鐵山。

太宗命楞額禮率精兵勦之。殺三百七十人。生擒一百四十人。獲馬二十一匹。九月復

命楞額禮等率馬兵一百。步兵二百。往雅爾古地方躡

緝逃人。遇毛文龍探參者。殺九十六人。生擒千總三員。及其從人十六名。以歸。五年五月。撥馬兵一千五百。步兵四千五百。以楞額禮為右翼總兵官。喀克篤禮為左翼主帥。往征南海島。八月。隨

太宗親征大凌河。先是明守城總兵祖大壽力竭計窮。太宗遣姜新招大壽降。大壽率衆官出城。與姜新相揖而見。遣遊擊韓棟與新偕來。由將軍楞額禮所守之門入。楞額禮令軍士戎服執戟。林立門內。

外。備極嚴密。及

太宗遣大海巴克什。庫爾纏巴克什。送大壽使者入城。楞額禮不容遽入。令其遠立。詢問姓名。詳察面貌。一一驗畢。然後令入。棟等目擊軍威。及城守戒嚴狀。料一人不能潛逃。還白大壽。大壽降志始決。七年。復率所部兵。往雅爾古一帶。躡明兵踪跡。遇明人盜參者。斬二十四人。生擒四十九人以獻。六月。奏請先率外藩蒙古及本國兵。直抵明內地。焚北京周圍廬舍。敵出則殺之。蹂躪其糧草。牲畜財物。任我兵飽取而回。然後再整師旅。復入山海關。山海關既得。即屯駐城中。多積芻糧。以備往來攻伐之用。當

上天與我之時。若不速圖。遷延歲月。則彼漸知防備矣。至於朝鮮。姑與和好。惟急圖明國。則朝鮮自為我有也。明年正月卒。

太宗欲往臨其喪。諸貝勒諫不允。遂往酌酒者三。哭之。慟。大貝勒代善。及諸貝勒大臣。無不往者。九年。太宗遊盛京北山。見其墓。下馬奠而哭之。順治十二年。

追諡武襄。子穆成格襲世職。累官副都統兼兵部侍郎。穆成格卒。子穆赫林襲世職。三遇

恩詔。晉爵至一等伯。累任掌鑾儀衛內大臣。

那木泰。楊古利第三弟也。幼事

太祖高皇帝。屢從征伐。積軍功。累加至總兵官。緣事革職。天聰元年。

太宗文皇帝嗣統。念其前功。擢為固山額真。三年。

太宗親統大兵伐明。令那木泰率本旗兵。攻遵化城北面之西。克之。明年春。

命那木泰等駐防灤州。二月。大兵還瀋陽。

命偕文臣庫爾纏。巴克什等鎮守遵化。五年。同布爾吉入明境。哨緝。攻拔一臺。獲六人。還。明兵十三站。汎地。設伏擒二哨騎。比還。遇我國逃人。斬六人。執九人而歸。五月。

命同圖爾格率兵一千。往覘明人脩築大凌河虛實。因遣阿爾津回奏築城事。虛。並執前來歸三人繫之。是年初設六部。七月。授兵部承政。考績。授遊擊世職。十月。

太宗親圍大凌河。命同圖爾格率兵千人往略錦州松山。擒明守備一員。兵十六名。並馬牛來獻。八年。太宗征明。遣那木泰由宣府攻略朔州一帶入邊。前往上方堡。拆毀邊牆。攻臺捉生。大兵進至大同。那木泰同阿巴泰貝勒等攻王家莊。先登克之。明年。

詔以那木泰統右翼兵。吏部承政圖爾格統左翼兵。共精兵一萬。隨多爾袞等四貝勒。往取察哈爾林丹汗子額爾克孔果爾額哲。

太宗率出師。諸貝勒將帥謁

堂子。送至演武場。授以方畧。遣之。八月。我兵出長城。

自應州赴平魯衛。城內有馬步兵五百。出城列陣。貝勒等見之。令那木泰。圖爾格率兵破其陣。追擊至城濠。明兵死者百餘人。又明潰兵馬步五百餘。於臺上列營。那木泰見之。圍臺奮擊。盡殲其衆。是年十月病卒。

太宗時幸馬厰閱馬。聞之震悼。欲臨其喪。諸貝勒力諫。乃止。因以

御服貂裏蟒朝衣賜之。斂不勝慟悼。至夕方還宮。十年  
敘功。授三等梅勒章京世職。第四子阿哈連襲。  
阿哈連自立功績。授拜他喇布勒哈番。又一拖  
沙喇哈番。以父職與兄阿拉密襲。順治七年遇  
恩詔。加為二等阿思哈尼哈番。緣事降為一等阿達哈  
哈番。九年遇二次

恩詔。仍加為三等阿思哈尼哈番。緣事復降為一等阿  
達哈哈番。是年從征湖南。擊偽秦王孫可望於  
岔路口。力戰陣亡。復授三等阿思哈尼哈番。

譚泰。楊古利額駙叔父。登古申之子也。初從征  
董夔有功。天聰八年。任至擺牙喇。甲喇章京。從

太宗文皇帝征明。由上方堡拆毀邊牆而入。尋奉  
命前往埋伏。大兵繼進。敗明兵。克保安州等處。師旋。擢

固山額真。崇德元年五月。同多羅英郡王阿濟  
格等征明。克延慶州等十二城。譚泰率每牛录  
甲士四人。埋伏軍後。遇三屯營守備一員。率兵  
來探。合大兵圍於屯內。盡殺之。獲馬六十六匹。  
進圍定興縣。譚泰先登取之。凱旋。十二月。隨



太宗率兵征朝鮮。至朝鮮王京。豎梯登城。城上兵不敢拒敵。各路奔竄。王棄城遁走。入南漢山城。譚泰率阿禮哈超哈兵。入王京城。搜勦軍兵。復隨太宗從外路徑渡漢江。直抵南漢城。駐營。朝鮮王降。四年。隨奉命大將軍睿親王多爾袞。證明。從太平寨。率每旗梅勒章京一員。甲士三人。往奪其關。前後敗敵十三陣。獲馬六十匹。六年。大兵圍錦州。明經略洪承疇率兵十三萬來援。八月。太宗統大兵征之。明郎中張若麟從小凌河乘舟遁。譚

泰率阿禮哈超哈兵四百。往小凌河直抵海濱。絕其歸路。

太宗大兵將至。譚泰等奏言。臣等仰藉

聖主天威。豈敢畏敵。但恐以臣等為怯。不得不以奏聞。聖駕親臨。臣等勇氣增倍。諸所不計。惟務進攻。但為圖功。敢陳一得。今明兵甚衆。臣等先率兵圍錦州。累經攻戰。微有損傷。如再連戰。恐力不及。頃奉旨令屯營高橋。倘敵兵為我所迫。約錦州松山兵內外夾攻。協力死戰。為之奈何。

聖駕即欲自高橋來援。亦必待勝負少分。方可趨至。今如暫駐松山杏山之間。則臣等大有益矣。

太宗允之。遂進戰。明兵敗。退保松山。復

命譚泰等率師困錦州。明年三月始還。十一月同輔國

公篇古等率師征明。抵薊州。明總兵白騰蛟白

廣恩等奔還薊。與我兵遇。擊敗之。生擒叅將一

員。陣斬遊擊三員。獲馬六百餘匹。八年奉

命統官兵更番駐防錦州。順治元年。隨睿王多爾袞入

山海關。勦流寇。追至慶都。大破其衆。又率噶布

什賢兵。追至真定。連破之。賊焚輜重。倉皇敗走。

燕京迤北及天津真定等處皆降。明年敘功。授

譚泰一等公。尋緣事革爵。五年。逆鎮金聲桓等

據江西叛。僭稱豫國公。

詔以譚泰為征南大將軍。統官兵進勦。七月薄南昌。圍

其城。明年正月十八日。令固山額真何洛會領

擺牙喇甲喇章京喀爾他喇。署甲喇章京根特

巴圖魯。至城南樹雲梯進攻。十九日午後。蒙古

固山兵先登。叛賊金聲桓中二矢。投水死。仍磔

尸示衆。生擒其黨王得仁正法。盡殲賊衆。南昌等六府悉平。時廣東逆賊李成棟僭稱惠國公。破贛州信豐。又有賊偽充國公。竊據南康。譚泰遣兵先破偽充國公。殲除殆盡。繼抵信豐。前後合圍。獲逃者。訊知賊謀夜遁。遂令梅勒章京覺善等。豎梯攻克其城。賊潰散渡河。遣署梅勒章京宜爾格德等督兵追勦。李成棟溺水死。隨令肅章京宜爾德底定撫州建昌兩府。復破偽總兵楊奇盛兵二千有奇。擒斬渠魁。撲滅餘孽。江西悉平。凱旋敘功。復授一等精奇尼哈番。後坐睿王事正法。子三人。長唐古哈。自立軍功。授拜他喇布勒哈番。遇

恩詔。加授為三等阿達哈哈番。唐古哈子阿爾裨。曾任吏部侍郎。工繪事。作龍虎大幅。尤知名。唐古哈弟之子俄福和。以七品官從征陣亡。贈拖沙喇哈番。

譚布。譚泰之弟。初管牛录章京事。天聰五年。太宗文皇帝親統大兵。掘壕圍大凌河城。譚布從征。率

擺牙喇兵一百五十名。追敵兵採樵者。斬三人。生擒二人。崇德五年。隨薩木什喀曹海等。征虎爾哈部落。鐸陳等四木城人。抗拒不降。譚布率兵助攻。遂破雅克塞城。敘功。

賜人口貂皮等物。授半個前程。六年。從大兵圍錦州。守木魯河。錦州兵突出。轟章京噶布拉失利。譚布獨衝入敵陣。大敗其衆。又同兄固山額真譚泰。屢敗明經略洪承疇兵。積功。擢管梅勒章京事。七年。復掘壕圍錦州。城內馬兵出戰。率本固山兵擊敗之。又加半個前程。授世職。為牛录章京。八年。奉

命率官兵更番駐防錦州。順治元年。隨睿王多爾袞。入

關。擊流寇有功。加世職。為二等甲喇章京。明年。隨饒餘郡王阿巴泰。率官兵往征山東。是年。偽福王總漕田仰。殺州縣官作亂。譚布領兵往勦。至湖口橋。遇賊步兵三千。同康喀喇步戰。敗之。又連次擊敗賊兵於三里橋。如臯縣等處。師次馬家口。賊以步兵一千拒敵。復敗之。樹雲梯克

通州招撫三縣。論功。加世職為一等阿達哈哈  
番。又一拖沙喇哈番。六年。大同鎮姜瓖叛。隨端  
重親王博洛。率兵討之。賊由大同北山出。立二  
營。來逼我軍。轟章京。鰲拜等。破其一營。譚布等  
復破其一營。賊遂大敗。又追擊於平陽府汾州  
府等處。事平。加世職為三等阿思哈尼哈番。八  
年。任工部尚書。卒於官。子三人。次喀岱。襲父世  
職。累官至都統。

宜爾德。武勳。王楊古利額駙伯祖達古巴圖魯

之曾孫也。天聰三年。從貝勒多爾袞。征明。攻錦  
州。遇明寧遠兵。宜爾德於楊古利額駙軍前。殺  
入敵陣。又從征北京。衝入城北明兵營。斬殺敵  
衆。尋遇薊州步兵。復衝入敵陣。敗之。比我師出  
邊。宜爾德先至木城。斬敵一人。生擒一人。五年  
攻大凌河。城中兵突出。同譚布衝入敵營。復生  
擒一人。又擊明監軍道張春兵。遇敵執弓者一  
人。直至

御營前。宜爾德突入斬之。是秋往略前屯衛。率十五人。

同劉哈追明哨卒。遇敵三人。追噶思哈甚急。宜爾德衝入斬之。積功授牛录章京世職。崇德五年。隨大兵圍錦州。敵兵突出。宜爾德領轟殺至壕邊。敗之。七月。錦州松山屯田王貝勒等。令宜爾德等率每旗擺牙喇甲喇章京一員。滿洲蒙古兵三百人。伏於錦州西南烏忻河口。待城中有牲畜出。即往木輪河追捕。次早獲牲畜而還。敵人覺之。遣兵千餘潛襲我兵後。宜爾德率後隊還擊。往來衝突。力敗敵兵。斬百餘人。獲馬十

三匹。加世職為一等梅勒章京。順治元年。奉命更番駐防錦州。二年。加半個前程。隨定國大將軍豫

親王多鐸南征。沿途招撫甚衆。我師至揚州。城北宜爾德獲百餘艘。南京既克。福王遁。宜爾德同圖賴等率官兵往追之。復敗偽靖國公黃得功軍。明年敘功。超授二等昂邦章京世職。六年。隨征南大將軍譚泰。征江西叛鎮金聲桓。平之。廣東賊偽惠國公李成棟犯贛州。同大兵往勦。成棟謀夜遁。我兵急攻克其城。李成棟溺水死。

譚泰令宜爾德率兵定撫州建昌兩府。江西悉平。七月敘功。加世職為一等精奇尼哈番。三遇恩詔。加至一等伯。又加一拖沙喇哈番。緣事革職。九年秋。起補固山額真奉

命。隨定遠大將軍敬謹親王尼堪征湖南。

賜蟒衣鞍馬弓矢等物。八月。賊入廣西。攻陷桂林。

世祖章皇帝命我兵進取廣西。抵衡州。賊兵大至。宜爾德等衝擊。大敗之。追二十餘里而還。十一年。浙江舟山。明偽監國魯王餘黨未靖。

世祖命宜爾德為寧海大將軍。統官兵征勦。明年。海逆偽總兵王長樹。毛光。祚。沈爾序等。擁賊兵登岸。侵犯大嵐山等處。遣梅勒章京顧祿古。總兵官張承恩。引兵趨夏關。擊敗之。至兩斗門。賊復迎戰。又擊敗之。斬長樹。光。祚。爾序。并頭目。及賊兵無算。宜爾德自率師次寧波。乘舟趨定海縣。分三路進發。賊渠偽總制陳六御。偽英義伯阮思於海島望江口山下。列戰艦以待。宜爾德率官兵進攻。賊兵敗北。追至衡水洋口。斬六御。思等。

餘黨悉平。十四年凱旋。

世祖命多羅貝勒杜蘭等。逆勞於郊外。進爵一等侯。又加一拖沙喇哈番。十五年奉

命同安遠靖寇大將軍信郡王多尼。統官兵進取雲南。由貴陽路至安。斬其偽劉將軍。追至盤江。賊兵焚鐵索橋遁去。我兵作浮橋而濟。至松嶺。衛偽鞏昌王白文選。率兵二萬拒敵。我兵分路進擊。大敗之。遂至雲南。偽晉王李定國等。以偽桂王奔永昌。十六年克永昌。雲南悉平。是役也。

世祖念出征將士。長驅深入。更涉寒暑。

賜宜爾德蟒袍一件。皮坐鞍馬一匹。十八年卒。

予祭葬如典禮。謚襄敏。子拖和氣。任二等待衛。早卒。孫巴渾岱襲侯爵。累官至領侍衛內大臣。自有傳。見得謚名臣。

舒楞額。宜爾德弟。穆成格孫也。由護軍初任藍翎侍衛。旋陞三等待衛。又累陞至一等。尋轉護軍叅領。晉正紅旗漢軍副都統。兼管吏部侍郎事。雍正八年六月。



特命往阿爾泰地方。領兵出征準噶爾。九年六月。領右  
衛兵。隨靖邊大將軍內大臣公傅爾丹。與賊戰  
於和通胡爾漢諾爾地方。舒楞額奮勇擊賊。歿  
於陣。議卹。贈拜他喇布勒哈番世職。以其子德  
爾松格承襲。



